

四庫全書

集部

欽定四庫全書

存研樓文集卷十四

編修儲大文撰

書後書

書宣示帖後

予家貧，學法書，墨蹟年十一歲。先君出示鍾太傅尚書宣示帖，知書者多嗜觀之。梁武帝云：「逸少不及元常，猶子敬不及逸少。」陶隱居云：「江東無鍾迹，今流傳書惟宣。」

示帖差繁勝於還示帖墓田丙舍帖黃伯思法帖刊誤
曰尚書宣示帖鍾書真蹟本在王丞相導家導過江時
藏衣帶中以遺逸少逸少以遺王濛子修修死其母以
修平昔所寶并入棺真蹟遂絕此本右軍所臨者蓋僭
右軍臨墓田帖右軍早歲臨長風帖而未克變鍾體者
并大令臨白騎遂帖胥為二王臨鍾帖然王丞相藏奔
之其寶貴如此則家鷄野鷺之功當專用於宣示帖非
王世將裁傳鍾體李充母衛夫人雅善鍾法比雖謂真

蹟尚存可也予家帖乃淳熙續帖閣善本三月二十九日先君忌辰也書之以志哀感又米元章書史云關杞嘗謂予曰昔越州一寺修佛殿於梁拱內藏一函古模數十本所可記者王右軍十七帖虞世南枕卧等帖皆有儲氏圖書印此并宜附書以備予宗故事

書重立瘞鶴銘碑記後

右滄洲陳先生重立瘞鶴銘碑記瘞鶴銘顛末暨先生重立銘石顛末鎮江府丹徒縣三山焦山諸志既登海內

工言士謨迷畧具先是先生守蘇命特理藩篆清望籍
甚會有齟齬者矣命鎮江盈再期士辰冬事解間遊焦
適江水大落俛眎銘石縱橫欹峙慨然者久之訖克募傭
用歲茲役起七八百年之顛墜於荒江削壁之間而俾嗜
古士無病其摹搨之艱視歐陽趙集錄尤逸也是以賦
者滋衆以侈石之遭且胥頌先生曠識焉或曰石沉而
復顯其為先生祥乎或曰夫豈直石也庚桑子洞顯於
周仇池顯於晉雁蕩顯於晚唐天下名區輿境仙靈之

所棲息多伏而不出重有類於才人志士之沉淪頓躓
而號為嗜奇者多不克緇深燭幽無以極其所至或有
可以振之之力卒坐視而莫之振雖山水字畫之與世
無爭胥不獲免也憶歲辛巳壬午嘗讀書山寺日晡輒
出坐沙中盤石俟日落訖乃返而角觝石尤數嘗記曰
磨崖題識率在山以前策屨稠襍之地而揀江諸石自
瘞鶴巖外殊少饒勒然則焦之廣裁餘二里而嗜奇而
極其所至者蓋眇也矧天地之內杳冥幻化而不可推

詰且越茲山萬萬哉或曰易曰敦臨之吉志在內也孟子以齊宣王見牛為仁術山殊奇削銘尤古先生振之於不易振以無俾卒陷蛟魚鼉鼉喧逐排突之窟而星日曜之此仁也抑豈直區區搜剔遐怪點綴蒼碧云爾哉今先生復直編纂局望且日峻予雅無所用於世行謀南歸復游茲山於浮屠氏摩挲銘石間述海內清議歎山椒水渚之有以自壽而光顯而工齟齬者不埃淹久輒易磨滅抑亦少備是正金石文字之助云

書柳宗元傳後

或曰唐宋八家中韓吏部蘇端明歿為神宜矣觀吏部羅池廟碑子厚沒亦為神何也曰宋有翼嚴氏序子厚文云王叔文工言治道順宗在東宮頗信重之及踐阼方欲有所施為然與俱文珍韋臯等相忤內外讒譖交口詆誣一時在朝例遭竄逐而八司馬之號紛然出矣作史者不復審訂其是非以一時成敗論人故黨人之名不可湔洗子厚亦可謂大不幸矣尚賴本朝文正范

公之推明之也曰劉禹錫柳宗元呂溫坐王叔文黨貶
廢不用覽數君子之述作體意精密涉道非淺如叔文
狂甚義必不交叔文以藝進東宮人望素輕然傳稱知
書好論理道為太子所信順宗即位遂見用引禹錫等
決事禁中及議罷中人兵權悟俱文珍輩又絕帝臯私
請欲斬劉闢其意非忠乎臯啣之會順宗病篤臯揣太
子意請監國而誅叔文憲宗納臯之謀而行內禪故當
朝左右謂之黨人者豈復見雪唐書燕駁因其成敗而

書之無所裁正孟子曰盡信書不如無書吾聞夫子褒貶不以一毫而廢人之業也文正公之論人可謂明且恕矣然則柳州交王叔文文正公大賢業已雪之而宋祁之書視劉昫尤鑿不足據也韓碑成於穆宗長慶三年在譔順宗實錄之後越一年吏部亦歿其識尤為慙覈又考龍城錄則子厚之為神冥冥中業已定之故宋元祐中柳州民乞加封爵或賜廟額勅賜靈文之廟崇寧三年又封文惠侯告辭曰生而昭與後且不亡而今

蒲州虞鄉縣有子厚上馬石天將雨輒瑩潤亦具靈徵云

書皮光業見聞錄後

皮光業見聞錄曰張郁潤州小將也鎮海節度使周寶差郁押兵士三百人戍於海次因光啟二年春正月旦酖酒殺使府安慰軍將度不免禍遂作亂潤州差拓拔從領兵討之郁自常熟縣取江陰而入常州刺史劉革到任方一日親執牌印於戰門而降又曰潤州兵至

郁奔高霸於海陵此陽舍巫門黃山黃田秦望鄭瀆孟
瀆庾塘之戍所以不可罷也光業日休子新唐書資治
通鑑黃巢以太常博士皮日休為翰林學士而陸游老
學庵筆記曰該聞錄言皮日休陷黃巢為翰林學士巢
敗被誅今唐書取其事按尹師魯作大理寺丞皮子良
墓誌稱曾祖日休避廣明之難徙籍會稽依錢氏官太
常博士贈禮部尚書祖光業為吳越丞相父瓌為元帥
府判官三世皆以文雄江東據此則日休未嘗陷黃巢

為其翰林學士被誅也小說謬妄無所不有師魯文章
傳世且剛正有守非欺後世者此可正唐書謫舛并可
正明李勸進表早下江南策之譌謬

書宋贈焦光明應公敕後

右宋贈焦光明應公敕硬黃紙寫前有慶元中觀文殿
學士陳騭書御書之寶四大字後別行云祥符六年二
月四日下加寶馬寶左微闕敕亦間闕三數字要為朗
畫可閱誦凡焦先焦光異同及宋托夢神仙以續天書

之妄前輩辨之詳矣不具論顧予獨有感也自宋祥符
歷二百餘年而至慶元又五百餘年而至今中間兵燹
不可勝數其彰灼者若兀术之再渡明之興劉六劉七
之擾鄭鴻達之奔以及王師之渡江海寇之亂或傍山
或否要其搶攘固已久矣而元阿珠至親登南岸石公
山指揮諸軍又遣將登焦山南麓遂與宋沿制置使趙
潛樞密都承旨張世傑知秦州孫虎臣大戰於山之北
明人書碑後所謂南北兵舡門首交戰者也當時寺院

碑石焚掃無遺矧其他哉又自宋訖明磨崖諸刻其堅且确不啻萬倍救焉今無不泐蝕難辨者而救獨至今不毀又不甚漫漶幸哉寺僧其尚永寶藏之無斁

書武夷集後

宋翰林學士楊文公大年今傳武夷集康熙戊戌己亥間予錄為四冊歐陽文忠公嘗曰楊大年真文豪也蘇文忠公曰近世文章華靡莫如楊億予謂大年才在歐陽蘇之下劉侍讀曾舍人蘇編禮之上其詞極豐贍而

不敢指為肥腴體者以氣決之也考史大年建州浦城人天性穎悟年十一舉神童自幼及終不離翰墨博覽彊記又長典章制度性耿介尚名節一時學者翕然宗之又考史景德元年冬十月己酉以大年判史館會修冊府元龜偕王欽若總其事序次體製皆大年所定羣僚分撰篇序詔經大年竄定方用之十一月從幸澶淵寇準傳所謂留居北城與知制誥楊億飲博歌謔歡呼者也洎三年夏四月迺為翰林學士同修國史凡變例

多出大年手真宗尤眷顧之洎大中祥符五年冬十二月將立德妃劉氏為后使丁謂諭大年草制大年難之謂曰勉為此不憂不富貴大年曰如此富貴亦非所願也迺命他學士草之大年性寡合在書局人多怨謗王欽若驟貴大年素薄其人欽若銜之陳彭年方以文史售進忌大年名出其右相與毀訾一日直院上忽夜召見於禁中小閣賜茶從容者久之出文藁數篋以示曰卿識朕書蹟乎皆朕自起草未嘗命臣下代作也大年

惶恐不知所對頓首再拜而出乃知必為人所譖矣後
天禧四年秋九月真宗疾愈冬十月戊午召近臣於龍
圖閣觀御製文詞曰朕聽覽之暇以翰墨自娛雖不足
垂範亦平生游心於此因內出七百二十二卷付宰臣
然則翰墨固真宗之所深嗜臣下代作固其所深忌而
當景德大中祥符間大年眷顧有加之時欽若彭年諸
宵小力圖以乘間而譖之者也大年知不容於院直亟
歸楊翟別墅與其弟偉養母以疾求解職而臺臣有不

俟命而去之劾迺授太常少卿分司西京養疾是大年
之在翰林且寢七載也真宗嘗語王旦曰楊億好謗時
政旦曰億幼荷國恩知所自立若諧謔過當則恐有之
至於謗訕臣保其不為也會大年啟朝中親友曰介推
母子願歸綿上之田伯夷弟兄甘受首陽之餓希旨言
事者又攻之不已因復啟親友曰已擠溝壑猶下石而
未休方困疾藜尚彎弓而相射蓋深知其不容於世也決
矣間著君可思諸賦詠以自遣而真宗雖恩禮寢衰意

亦未嘗不屬也洎七年春正月起知汝州會幸亳州加
上玉皇聖號表求陪預即代還以為參詳儀制副使知
禮儀院判秘閣天禧二年冬十月為工部侍郎三年三
月丙寅坐知貢舉復有不休哉之謗偕錢惟演降一官
洎四年夏四月乙酉乃復入翰林為學士受詔注釋御
集又兼史館修撰判館事蓋去院直凡六年是時彭年
以形神過瘵卒欽若亦去中書始釋臣下代作之疑矣
而越二月寇準密令草表請監國準遽貶大年亦以是

歲十月卒其距真宗幸龍圖閣裁越旬日也范文正公嘗贊大年畫像曰公以命世之才其位不充故天下知公之文而未知公之道也昔王文正公居宰府僅二十年未嘗見愛惡之迹天下謂之大雅萊公當國真宗有澶淵之幸而能左右天子如山不動却契丹保宗社天下謂之大忠樞密扶風馬公慷慨立朝有犯無隱天下謂之大直此三君子者一代之偉人也公與三君子深相交許情如金石則公之道其正可知矣予錄武夷集

匪直以文實以氣也故嘗謂宋有三翰林焉曰知蘄州王公元之曰提舉玉局蘇公子瞻曰翰林學士楊公大年

書胡宗愈劄子後

宋元祐中胡宗愈請令帶職人赴三館供職曰臣愚竊謂士不知朝廷之治體則不足以立朝不習國家之故事則不足以應務唐李德裕謂用寒士不如公卿之世議者以為偏論臣乃謂之知言蓋公卿之世耳目習朝

廷之治體練熟國家之故事遠方寒士有不知其始末者德裕之言未為過論太宗皇帝深達此意始置崇文院建秘閣集四庫書選天下名能文學之士以為校讐官給以見俸食於太官優其資秩自選人京官入者始除館閣校勘或崇文院校書及升朝籍乃為秘閣集賢校理或優之則為直館直院直閣其始入而官位卑者未得主判且令在館供職改京官升朝籍方得主判登聞鼓檢院同知禮院之類資任漸高則為吏部南曹羣

牧判官又高則為省府推判官或出知藩鎮轉運提刑
又擇其久任者或遷知諫院預講讀或擢為左右史遂
典詞誥或待制內閣繇此而為公卿執政以躋台輔遠
器大節方重深厚事業磊落載在史冊者前後相望外
至於守土奉使藹然皆有風績可觀間有不才闕茸者
叨預於其間則指目鄙笑不容於清議故累朝得人方
古為盛此實太宗皇帝憂深慮遠養育之功也熙寧執
政務欲速援親黨假此以為進人之階浮躁狂妄者爭

趨之故有朝除校理而夕拜詞掖夕為直院而朝作輔
臣館閣涵養之風遂至掃地士人廉恥之節靡有孑遺
既無素養之才悉為苟合之士臨時選用或非其人左
右史才間用俗吏以致朝廷厭薄館閣遽行寢罷陛下
即位以來招賢樂善追復太宗皇帝之政繼承列聖之
業俾復三館職名又詔執政大臣各舉所知召試以充
其選獨不許其供職臣愚莫知其意竊計議者必謂昔
之崇文院已改為秘書省已有官屬則帶館閣職名者

不可供職臣愚以謂崇文院之名雖改而秘閣集賢昭
文館四庫之書猶存既選英才除職名而不令供職不
法太宗皇帝養才育士之深意而徒以虛名為士大夫
進取之階不惟義理未安兼亦於事無補臣愚望朝廷
稽考祖宗館閣之制選人京官除者且授秘書省正字校
書以比昔日之校勘選人已有改官并供職四年改校
理指揮外有自京官除者亦自校書郎二年方授校理
已升朝者得兼寺監職事以比昔日之主判繇此漸進

以歷省府與舊帶職之人並令入館供職依舊食於大
官磨以歲月使多士知陛下有才之意庶幾優游議論
漸知朝廷之治體羣居講習以議國家之故事廉恥清
議去而復還館閣素風隆而復振朝廷自後用人不乏
實才將以成太平之業臣愚以為自此為始惓惓之意
惟陛下採擇臣愚不勝幸甚宗愈此劄於有宋館閣制
頗為詳覈其論太宗養育人才之意亦與明制相符然
首援李德裕語要為附會蓋德裕父吉甫嘗同平章事

宗愈父宿亦嘗副樞密故假此以張世胄仕進之幟非公議也且太宗選天下名能文學之士未嘗選世胄而此苟牽連及之是誣太宗也昔仙遊蔡氏鄧史氏館閣奕業烜赫曾不聞補宋政萬分之一而胥為害於民生國是明三代翰林雅調眉州萬氏而臣安之署書兵侍翰編之繼歿姬妾至抱金寶四逸而無主以為歸至今猶鄙之南充陳氏再世綸扉明紀錄胥譏循默以張文忠之機畧而翰撰翰編曾不能救家人眷屬門閭而無

計逸出之慘蓋非直尹厯城焦泌陽愚騃子貽誚而已然則德裕所謂寒士不如公卿之世者其然乎其不然乎若夫執政欲速援親黨朝除校理而夕拜詞掖夕為直院而朝作輔臣則仙遊蔡氏尤甚牢籠天下士入館閣如徐霖化人心思之說則鄴史氏尤甚至推及於館閣涵養士人廉恥載稽宋明允為篤論要以元余忠宣公唱名第二謂翰林無可表樹乃力請外而訖以大節震江皖其視虞揭索馬諸公終身詞苑者固不啻風斯

在下矣此則繇唐開元迄明館閣諸賢之定斷也

書何承矩傳後

李忠定備邊禦敵劄子曰一河北塘濶東距海西抵廣信安肅深不可涉淺不可以行舟所以限隔敵騎為險固之地而比年以來淤澱淺涸不復開浚官司利於稻田往往洩去積水隄防弛壞又自安肅廣信以抵西山地形低下處可益增廣其高仰處即開乾壕及陷馬坑之類宜專遣使以督治之又乞修塘濶劄子曰契勘安

肅廣信平涼等軍東有塘灤西抵太行中間坦塗不過三百餘里塘灤既可增廣其他地勢雖頗高仰亦可因高就下限以長堤潴畜水櫃以為阻固如水櫃不及之處自宜修築城堡屯兵控扼或設塹窰以虞奔衝茲事體大非藉能臣未易辦集竊見樞密副都承旨李邈累任河北邊郡風績素著深究邊防利害欲乞特建一司以邈充使專切措置塘灤城堡水櫃等仍乞朝廷多方應副庶幾克成大功以為永遠之利而乞修邊備劄亦

曰八曰增城壁九曰增塘濼十曰置堡塞至靖康傳信
錄則曰雖委汭邊增修塘濼城池而輔郡畿邑已降指
揮旋即罷止蓋八事中嘗請四輔郡諸畿邑皆築城創
置樓櫓也近京築城置樓櫓且罷止而汭邊塘濼指揮
其牆壁倚之也可知矣及其宣撫河北河東也又乞修
復塘濼舊制曰臣契勘塘濼深不可舟淺不可涉限隔
賊馬實為國家永遠之利緣塘濼有蒲魚稻田自來係
屯田司拘管以修治隄防為名其實以充私用往往放

洩塘水營利自豐漸令塘濶湮廢不足限隔深失祖宗之意今來新開塘濶皆係民田伏望聖慈特降睿旨下河北路轉運司相度會計一歲所修隄防之費量自轉運司及朝廷應副不許種植稻田其蒲魚之利許小民採取庶幾塘濶漸復舊制而沿邊貧民蒙陛下德澤實為大惠取進止御批雖依奏且曰卿一面作聖旨行下訖奏而塘濶之所以限戎馬者欽宗實未之克稔也

書劉屏山代寶學泉州論時事劄子後

荊子論江北曰自古倚長江之險者屯兵據要雖在江南而挫敵取勝多在江北故呂蒙築濡須塢而朱威以偏將却曹仁之全師諸葛恪修東關堤可奉以兵三千破胡遵之七萬轉弱為強形勢然也今日淮甸雖置守帥而無堅壁無聚糧或營一師之市或聚烏合之徒敵人一至則冰消瓦解千里蕩然長江之險舟楫之利固以與敵共之虛聲所搖人情騷動此由江北藩衛之不立也臣欲乞將淮甸郡縣不必盡守故城各隨所在擇

險據要營置寨柵守以偏將敵來仰攻固非其利若欲
長驅深入則我綴其後二三大將浮江上下為之聲援
敵之進退墮落吾計中矣朱威可奉之勲固可圖也江
北藩衛既立陛下移蹕建康觀時待釁以定中原此萬
全之策也論荆襄曰荆襄西通秦蜀東連吳會北據漢
沔昔人以為用武之地故三國戰爭皆出於此得之者
強失之者弱自喪亂以來棄為盜區國家多事未遑經
理亦幸敵人棄而不顧殆天以資我也今千里丘墟固

難卒守臣謂宜將荆襄合為一路增重帥權暫治公安
益兵聚糧為戰守計分遣別將渡江據險置柵募民耕
種積以歲月更為後圖一者貫通秦蜀無斷絕之虞二
者控扼上流如首尾相應三者窺闕中原有席卷之勢
是一舉而獲三利也今不早圖萬一敵人先之則主客
不侔利害易轍復欲爭之固已難矣欲望陛下沉機獨
斷亟詔大臣講論措置先事慮事以強立國之勢論吳
蜀曰昔三國鼎峙吳蜀為異邦然當時所以謀困曹魏

者常萬里尅期表裏相應況今二方一統力不應分竊見荆襄金房境壤相望乃西南之交吳蜀之會也若敵迫近江淮陝蜀之兵當稍循金房而南若窺全蜀則上流之兵當稍循荆襄而北批吭擣虛互為聲援以分敵勢此胥合南渡機宜而復論守江曰六朝守國皆輕戍江北重戍江南因險而守因守而戰內彊根本外鎮邊陲敵來則出驍將合銳兵先事而逆擊未便則清野鄙據要害伺間而後動故北兵遷延之絕畏首畏尾往往

狼狽亡遁大約皆此謀也昔陶侃不成邦其說謂設險禦寇政以長江隔江而城非三萬人不守引敵致禍實此之由若敵有可乘之會又非所資侃非失形勢也緩小利以全大利也蔡謨諫止諸鎮北移其說謂時有否泰道有屈伸須養威待時敵若送死制之有餘棄江遠進亦我所短謨非畏怯也知用其所長也何承天論守邊之計謂斥候之交非耕牧之地曹孫相持江淮之間不居各數百里宜堅壁繕兵以待敵來承天非泥古也

事有可法也侃之練事謨之見遠承天之燭機審利害
於當時垂龜鑑於後世今日形勢時宜畧與古同願詔
帷幄之臣稽六朝重戍之謀考三子慎守之策此亦江
防所宜考

書明一統志後

明一統志義陽城在孝感縣北一百里梁置西魏廢按
西魏於平氏縣置義陽郡蓋古申國地今信陽州是也
又按梁天監三年魏陷司州詔以南義陽置司州是時

有義陽郡又有西義陽郡南義陽郡西義陽在今隨州境而南義陽故址一統志謂梁以宋安郡為北司州黃陂縣為南司州楚志謂南義陽郡似當在黃陂今云在孝感縣北一百里與羅山應山近豈初置於孝昌境而黃陂之南司州後乃徙置耶予謂覽者詳覈此彌可以審義陽之形勝而五代時僑置諸郡縣胥無容鑿也

一統志又曰新市在孝感縣後漢王常起兵即此又曰新市城在京山縣南三十里漢光武起兵討王莽嘗聚

於此後置縣曰南新市西魏因改富水楚志曰按後漢書南新市侯國屬江夏郡宋書荊州江夏郡亦有新市縣唐杜佑通典郢州富水縣注云後漢新市縣故城在縣東北宋淳熙丙午富水縣令張實修縣志雖辨拆新市而未嘗援及孝感故孝感新市之名不彰竊謂前漢地理志江夏郡無新市縣而王常起兵則在前漢之季是王常起兵之新市乃安陸縣鄉市之名非縣名也蓋在孝感之北境今新店是已其後光武起於舂陵招致

新市兵後漢地理志始有南新市侯國唐元和郡國志
宋元豐九域志俱云後漢於安陸立新市是南新市縣
置於後漢蓋在今京山之南境富水之新市故城是已
豈可以後漢之南新市即為前漢王常起兵之新市哉
又晉書竟陵郡有南新市酈道元水經注云新市縣在
雲杜城屬竟陵郡蓋今之應城京山竟陵皆晉時雲杜
縣之域也又齊書郢州江夏郡新平左郡司州安陸郡
皆有新市縣其郢州東牂牁郡又有西新市南新市東

新市縣或者即以東西市為孝感蓋不知齊之郡縣多
僑置耳烏足憑乎夫新市之名不一而孝感新市實與
隨之平林為近土人相傳為王常起兵處故一統志存
之子謂孝感北境京山南境地胥巖險胥可起兵故明
一統志兩存其說楚志覈矣而實未盡也

題王允寧孝烈皇后挽歌後

允寧歌曰扶天有駿功又曰聖念為當熊陳兵垣選明
詩謂指曹妃宮婢之變而明詩諸選本仍之蓋孝烈竟

以定內難故得先世宗越典祔七廟允寧雖未及見而孝烈彌留日天子感戀悽惻之指廷臣多能與聞者此所以間發微詞也當時曹妃最被世宗寵遇宮婢之變實不與知後同陷極刑或疑宮監受孝烈指搆之京山王太僕汝化嘗咏漢宮人曰秋入披香玉露濃晚粧初罷鳳樓鍾恃恩醉却昭陽酒誤把紅繩戲睡龍此亦指宮掖間事似并疑內外獄辭為文過深者人臣無將變出曹妃寢宮室觀後日槌擊紅丸之案妃死固無辭然

繼后遂用此至今天子上犯宗廟定典司國政者雖緩
詞以沮而竟不能如先朝大臣伏閣之爭此絕可痛也
宋章聖親率宮人定衛士之難當時臺諫內結溫成者
尚䟽變出后簾前請究主名假令帝意回惑安知不以
世宗之所以罪曹妃者為溫成正位地乎竊懼後世宮
掖陰妬讒嫉變械萬端至求人族滅事以為容悅而世
主之無以察之也間因閱明人詩題此

書何元朗語後

何元朗曰衡山先生在翰林大為姚明山楊方城所窘
時昌言於衆曰我衙門不是畫院迺容畫匠處此惟黃
泰泉馬西元陳石亭與相得酬唱甚歡二人只會巾狀
元更無餘物衡山數公長在天地間今世豈更有道著
姚淡楊維聰者耶程松圓曰快哉斯言百世而後猶可
以興起也近日汪茗文亦嘗書之予按元遺山中州集
撰李長源傳謂當時亦有不直雷李者其識正同予曩
送禮執入都一律云藤已成霜管又丹上車不落進賢

金外紀卷之四
卷十四
冠隨肩莫信朝叅易結古繇來史館難雷李清班輕駮
足姚楊下士笑漁竿非窮非達皆絲淚贏得離樽點半
殘歲辛丑臨川少司馬李公亟問雷李姚楊典實予繙
公案頭書指眎之迺赧然一笑

書壯悔堂集後

康熙丁巳予年十三侍先君梗陽授經長平牛潑洋先
生先生先君乙卯所取士也夏四月歸長平時予愚騃
甚畧無所覩又不多作制藝先生亦久之遲不至獨几

上存雪苑侯朝宗壯悔堂集一部間取覽之用資嬉戲
雖未能習熟曲折而大意殊了了如遺阮光祿吳駿公
諸書絕喜吟諷之也是年冬先生復就館明年予歸不
獲卒業壯悔堂集亦久不取閱視先君嘗曰明三百年
無古文詞獨侯朝宗耳蓋朝宗文雖間近淺薄如近日
諸公指摘者而飛動之氣自然橫絕故應凌晉江崑山
上也又朝宗文雖用氣勝而度態絕流佚蓋近五陵河
朔之風而非止啞啞叱咤見武也予少時之喜吟諷之

之者以此今年夏樓居無事復得別本讀之開卷展視
字畫如故而先君棄諸孤遽十三年先生前二三年縣
令粵西今久絕音問未審無恙與否然則死生聚散之
感既無忍復道而予忽忽二十年以忝父師之誨者亦
畧於茲編見之援筆書此未嘗不浪然雪涕也

書百三名家後并跋諸子詩

孟春之十有三日集於南園者古文辭目曰郭泰論曰
書百三名家後詩目曰國山碑歌而截句則晚明淑慧

八人也昔天如張先生幼嗜學書必手鈔鈔訖朗誦輒焚之復鈔如是者六七始輟右手握管指成繭數日輒刮去涴寒手數數沃湯後名其齋曰七錄偕同學受先張先生名振輦轂比詔徵遺書有司進三千卷有奇胥留乙覽而百三名家最研覈雅非同時艾千子曾弗人所克逮蓋海內慙於讀書者胥尊之今諸君子成吟互標鋒穎業已秀玉潭而雋龍湫矣又蘄倣七錄之遺彌進於懋實則雖西漢名家以暨陳徐僕射周庾開府隋

盧黃門薛司隸可復振也豈直虞仲於陵宿派已哉予
援書百三名家後并跋諸君子之詩至期而未集者俟
續編

書鶴樓詩集後

宋台海張平叔先生道家所錄南宗也好譔詩歌世傳
悟真篇偕道德南華參同契雅相伯仲而以亟於愛物
時時語大道司命忌之遇配且至再三然則善故不可
為邪伯安萬君世居荆溪西自其六世祖明司訓古齋

先生偕宋二程夫子門少監唐公王文成公門道通周
公號予邑三賢崇建專祠至太宗伯文恭公為世穆神
三朝名臣事詳明人諸史稿君少穎發稱高才生亟薦
不克售晚而嗜學彌篤歲甲辰齒業七十春夏杪猶日
手丹墨點勘唐李延壽南北史周且蘄復始清修士胥
歎企之性雅剛鯁賑乏植孀義甚高而比且卒卒凌寒
行豈其類平叔之時語大道而愛物殊亟者故應有譽
耶君雅工儷語樂府尤喜賦詩今觀鶴樓集暨甲辰孟

秋後諸詩藻逸融渾迺唐會昌大中以前諸家境詣匪
宋崑體後格宜其前修精鑒如蒿間姜先生季野萬先
生胥極推挹之而比且高視藝林混埃壙而格莫之少
挫然則茲集之流傳雖伯仲平叔悟真篇焉可也平叔
遇岐山石先生事旋釋而遂開道廣翠虛海瓊之宗然
則司命者當此殆不偶然而士君子有志於道抑匪以
顛躓艱厄而少怠也世之為岐山石先生者殊不尠矣
今而後君亦日誦未逮點勘書勤勤彌嗜義焉以祗述

古齋先生文恭公之學斯已矣夫何患乙巳秋九月二十有二日書

書畫山樓圖後

李滄溟先生序酬李東昌寫寄白雪樓圖詩曰樓在濟南郡東二十里鮑城前望太麓西北眺華不注諸山大河清河交絡其下左瞰長白平陵之野海氣所際每一登臨鬱為勝觀東昌李使君子朱以讀白雪樓集於廣川馬中丞家咄然壯之歸為圖以寄而攀龍贈焉如此

詩曰詩名東郡沈隱侯那復擅奇顧虎頭江湖槃薄有
能事畫我山中白雪樓推毫已驚海色至無乃兼驅蛟
蜃遊須吏百里岱陰合咫尺疑聞清河流華不注山得
非雨平陵以西胡獨秋松風似欲卷綃起良久看雲失
去留丹青快意癡如此丘壑過人老即休使君實解郢
中調為爾深知宋玉愁此雅可髣髴白雪樓之勝觀矣
宛陵沈先生圖予家畫山樓而吳興王子立夫為致之
殆無其勝而虛辱虎頭之筆者邪抑邱壑過人感慨率

類此邪予不見立夫八九載展圖輒觸爰復書滄溟律
曰繇他不淺山陰興遠道無因報子猷

書閬仙故宅

志乘傳房山縣南十里土埠為唐賈島墓明弘治中御
史盧訪獲於石樓村徵仆斷碑迺植碑闢地三畝大學
士茶陵李文正公復植碑記焉按唐姚合過賈島故居
律曰新墓松三尺杜荀鶴賈島墓曰山根三尺墓而不
晰指其地李頎曰千山隔旅墳李洞曰旅葬新墳小魂

歸故國遙又過賈島舊地曰遙天何益抱墳青釋可止
哭賈島曰燕生松雪地蜀死葬山根則其為旅葬於蜀
也審矣而李文正公律亦曰葬來詩骨青山瘦望盡荒
原白草平無地椒盤供廟祀有人驄馬問村名詩注曰
時盧侍御修復其墓辭胥舍而不露至涿州頓銳過賈
島墓曰桐鄉遠在今西蜀梓里遙憐古北平又過賈島
故宅曰故巢留梓里瘦骨寄桐鄉其辭彌顯而景物畧
於房山縣終書賈島墓蓋不敢點破畿輔之古蹟也若

閼仙初祝髮雲蓋寺一曰法善寺隸瀛州城南景州西南五十里有賈島村一曰賈島峪而房山亦有石菴曰賈島菴此庸可徵覈予以釋可止律曰燕生松雪地李洞亦曰境搜松雪仙人島爰書曰松雪而後書故宅而不書墓以存闕疑之指

書仲舅戶部公像

明殿閣學士少師贈太師者凡十有七人其非殿閣而秩贈者不與焉泐溪徐文靖公景泰甲戌第二人及第

晉膺援立崇陟首輔變眉州博野之轍導祥符茶陵之
先相業詳明史六傳而至成都公天啟壬戌進士墨義
圓敏以廉謹聞郎署間外祖儒林公理繁撥劇事至立
辦郡邑胥尊之伯舅莊烈癸未進士行卷瞻警偕宗王
駿公石霞茂遠胥播藝林今茂遠傳稿癸未同門譜手
定也晚年尤精詩律黃錫余顧修遠諸公雅重之伯舅
當長垣南日前銓注知山陰縣晉司南曹事詳閩起紀
乘仲舅戶部公文埒伯舅年十有七偕伯舅胥雋壬午

府尹試年二十四中己丑成進士銓注知雒南縣朱陽
關蘭草川以西金嶺以東民胥德之政績詳秦志制撫
按亟書上考擢主計部事遽卒年裁三十有二而伯舅
亦年裁四十有二惜哉仲舅配蔣安人早卒繼周安人
胥有婦德周安人年二十有八而貞守五十有七卒
族旌予邑自伯舅仲舅用年少取高科其後大文伯兄素
田亦年十有九雋府丞試式殆所謂酷似其舅者也漢
書曰遺子黃金滿籬不如一經沃溪台輔里第中構一

經堂楷書遒勁大文髻時日注覽焉蓋庠院曹司之遺
澤其勝黃金滿籬也遠矣大文不克逮事仲舅髻時侍
儒林公側嘗賜以卑椅輒喜日危坐其上今忽忽且七
十餘年而先宜人之墓木則業已拱矣為泫然者久之
戶部公偕周安人像歲久漫漶公曾孫公宇慤守遺經
復加裝潢爰敬書概畧以叙今昔渭陽之思并附宰相
世系表後

書張孺人孝行三則

張孺人陽曲文學君執公長女母冠孺人勤誨之省間
洒掃諸役俾臧獲無得代年十六歸同邑振公張先生
善事先生祖茂才公文虞庠公而尤曲叶姑王孺人意
王孺人獲痿疾日侍湯藥唯謹踰年疾日劇至不能自
運水火始差可負登厠後亦輟櫛沐輾轉胥俟人飲飼
尤艱唯孺人能任之雖先生亦不克代也時二姑幼先
生祖父胥羸耗力又無以畜臧獲胥孺人竭蹶營之而
事罔缺廢凡日昧爽起櫛沐訖即趨王孺人寢問夜安

否敬洒掃室內已即為王孺人盥洗櫛沐訖復為二姑櫛沐間治它務無少爽凡昧爽起調藥餌率先意察飲食所嗜治必潔進必時以匕飼之後匕多所齟齬則代以匙如是者日且十無少爽王孺人夜夢寐孺人侍榻側按摩或衾席埃垢懼帚多拂盥恒用手微熨之其附體也俾無少埃折迺止閒談舊事暨家務率至丙夜王孺人欲寢命退迺退或語次王孺人不應就視業熟寢矣迺敢退後王孺人病彌劇肢體措注少不愜輒沉痛

孺人以意製方圓大小枕十枚有奇從肩臂脅脛所宜
高下者而支砥之間日輒偕衾褥澣濯易以潔者間日
復澣濯之復以意創衣衾製謹具領袖或前襟而後缺
諸戚黨來視疾雅不知王孺人病極劇雖王孺人亦殆
忘沉痾之附體也時先生產寢落孺人日質簪珥簪珥
暨衣釐飲以鍼縷厘克濟而孺人或泣寒衣數纊或踰
午未克朝饔澹如也自王孺人始疾遂不克歸寧間思
寇孺人甚第傳語幸託侯疾間來就視寇孺人恒歎曰

此予曩不聽臧獲代役之力也王孺人中表嫂錢節婦也戚黨胥以嚴見憚一日禮會倅固請孺人不至節婦倭問客戚黨誰最有福衆對訖節婦曰此胥不足為福有福者惟張氏三姑耳三姑謂王孺人也衆問三姑貧且病劇尚奚福節婦曰他人痿病不一二年輒沒眇踰三年者今三姑幸獲孝婦匪直忘貧且克忘病者累年矣其為福孰大於是衆胥肅然節婦後見孺人必執手泣歎大原詩禮族胥傳誦之自王孺人始疾暨劇凡十

有一年迺卒孺人毀甚洎今寢四十年遇王孺人所嗜
必肅而薦之蓋聞吏有案醫有案今張孺人孝行此亦
婦事姑之案當偕唐華原柳氏述崔山南祖母唐夫人

事胥編小學者也

凡侍疾者
宜準此

王孺人卒長姑前獲疾孺

人事之如王孺人尋卒次姑右臂復以瘍廢醫暨戚黨
胥言不克濟孺人日為擲沐洗視勤易善藥者復六年
竟瘳為備奩具禮嫁之嫁後踰年瘍復發姑之衣履諸
務胥代縫濯之終其身

此所以慊王孺人
志也故入孝行

虞庠公晚而

性差煩食輒數炊孺人雅察所嗜進食訖輒屏立側聽復畜他食以俟更進有所欲言聞即辦虞庠公夜繙書漏率下二十刻有奇後夜進食如晝者復三四虞庠公雅安之此婦事男之禮右張孺人孝行三則敬書以備三晉孝行錄藁本

書燕堂奉母圖

燕堂奉母圖圖祁門橘園馬君曰楚奉其所後之母汪孺人也當孺人在室有隻燕亟止於庭頤頤牖前不去

家人以為咎徵既而橘園所後父訃至孺人歎曰天定之矣訖歸馬氏以序定嗣橘園奇愛之常肅誨曰汝奚以事我讀書敦行為尤要橘園克祗厥誨左右就養無少違凡三十年有奇孺人棄養橘園亦尋以毀卒弟秋玉君曰琯佩分君曰璐悼念其世母暨兄甚業建專祠復請工畫者作燕堂奉母圖大吏聞於

朝獲旌蓋從士大夫之言而代之請也雙韭山謝山全君謨文記實援檀弓汪錡事以比洪州字兆萬君吳興王

裁姚子復申演之其它狀表志傳暨摘園傳纂詳矣予竊謂室女奔喪未成為婦之疑義未廟見之例比洎近世熙甫歸氏說尤乖刺而汪氏魯公族國有急錡庸當力戰以殉迺若身不絳名位而史冊焯著如漢幼安管氏名初不越邴原華歆右比棄家浮海幅巾終老雖讓以三公而不顧此所謂漢處士管寧卒也唐昭諫羅氏嘗賦應舉詩曰早知世事長如此自是孤寒不合來又曰交親益相薄知己恩潛替又嘗賦曰靜憐貴族謀身

易危惜文皇創業難而尤重慨於不將不侯比離亂南
歸嘗上書錢武肅親提十萬旅北蕩朱梁巢穴此雖一
時韓偓張格輩為唐世臣未克建議而抑匪身都將相
并首黃河荒驛中者之所克逮也元雲林倪氏蕭閑泉
石裁埒顧潘曹趙輩比棄貲產遁匿衰柳敗莊間訖完
菰蘆異香之節其視一時詩人所謂南州孺子為民在
愧忝黃瓊太尉知者志識抑復迥絕矣它若東湖樵夫
金川門卒燕山衛卒史冊中不可勝數其事胥在熙甫

以前若必如所云是金匱石室之記載胥可焚棄而擅
弓并不宜列諸經也予家當元際二室女被紅巾掠急
奮身投臧林之深渡化為雙鳩用釋母哀事載郡邑志
予謂其義有與燕堂相符者并書之以復申雙鳩之旨
秋王君嗜書盡收辟疆園顧氏延令樹園季氏藏棄之
經籍而克武西齋尤氏菴竹堂天乙閣諸錄佩兮君嘗
舉博學宏詞科胥整雅士附書

存研樓文集卷十四

欽定四庫全書

集部

存研樓文集卷十五

詳校官中書臣陸湘

助教臣常循覆勘

總校官知縣臣繆琪

校對官中書臣李奎

謄錄監生臣任楫文

欽定四庫全書

存研樓文集卷十五

編修儲大文撰

碑銘表誌 祭告文 誄

哀辭 辭

光祿大夫兵部尚書范公神道碑

國家恭膺乾命統御海寓武冠文洽喆彥響臻時則有
若太傅秘書院大學士范文肅公叶契風雲經綸雷雨
太祖高皇帝肇遼陽三岔西平廣寧之烈實扈行營

太宗文皇帝廓潘家馬蘭三屯馬攔大安之圖實參幕
幄爰乃扼長山下雲從江華受琛兀蘇頌律以暨決策
署檄時乘京師收圖籍釐賦式實克光弼

世祖章皇帝之丕基顯祚而為一代宗臣

今上運隆下武克翦三叛時則有若福建總督范忠貞
公抵虐刃羈隘室感慨殉義光日月而炳春秋世濟其
美襲休衍慶廼復紀於兵部尚書光祿公公諱承勲字
蘇公系出宋文正公文肅公諱文程之叔子而忠貞公

諱承謨之弟也高祖明兵部尚書總曾祖瀋陽衛指揮同知沈祖楠胥

贈如文肅公官母金氏

贈一品太夫人公少而修整講覈經世之畫康熙紀元恩延世臣甲辰銓工部都水司員外郎改屯田旋遷刑部湖廣司三品郎中改山東詳讞十載廷署稱平丁已改都察院監察御史巡西城旋掌江南道協理河南道事嘗以山東江淮饑潦疏請緩徵又請廉慈吏註誤革

職偕降調官胥題留會地震求言請寬風聞處分而聽
京官三品以上條陳又請時

賜京官對飭章疏蔓詞班行胥歎識要體當是時閩海
底平忠貞公以節殉滇黔亦寢平而川東譚宏復叛公
伯兄都統公嘗鎮襄樊以遏金房庚申

詔繇虎牙鎮重慶公改吏部郎中護

禁旅往會討而都統卒於師公泣治含飲以行旋

命駐藝陵轉餉八萬石帑銀二十四萬兩師獲濟而宏

訖殲又

命監鎮安將軍噶爾漢軍繇永寧督滇餉公考次隋開
皇闢石門鎮唐天寶下兵南溪明繇蘭州入赤水畢節
道胥輓四十日糧諭諸土舍輸麥菽別檄截黔餉和買
米粟儲邸閣而滇圍始合訖克成功比還改吏選司擁
崇文門稅九卿合舉清勤

上雅知公才擢內閣學士坐漢班批紅本乙丑春以副
都御史巡撫廣西時剽軍興糧累萬部議九府折徵公

酌駐兵遠近貯糧多寡本折胥宜民便之又請蠲容鬱
藤賀十州縣陷賊放失銀米獲允檄修興安秦靈渠石
隄復唐斗門且斬胥繼余袞公韓袞毅公之經畫而丙
寅夏晉兵部左侍郎總督雲貴首禁攤買軍餉予直俾
自市飭鹺價無敢騰揭承買藩莊部價而明沐氏勲莊
田之撥給而後籍有司者始獲除莊租且省民溢價二
十一萬兩有奇又以滇屯賦十倍民田贍尺籍四萬餘
人之什七科徵時用軍法戶多棄業遁乃請裁大理等

六衛楊林等五所歸州縣且除九戶鈞賞之令凡開墾者無敢爭并力請蠲七年逋獲允民始蘇公勤料軍實而馭番尤善操縱魯魁山環新習蒙元景諸番時出掠號野客歲索軍民貨號保頭錢而楊宗周普為善李尚義方從化為之渠率公騰檄諭之乃籍目丁口隘以降蔑著弒主魯姐黨渠阿所隸蜀部戍姜州汎弁而賂協將為抵匿比事聞例勘復竄湯郎箐會里州間公遣將渡直勒脅東川土舍縛之力持辟奚議而賄協亦論如

律後尚義復出掠橄鎮協繇密白箐入奪叢隘尚義自
劉為善面縛而宗周實為鄉導宗周魯魁奚所號勒昂
者也公又疏免解姚安高翥映臯籍婦伙北勝高贊熙
俾復業土舍胥悅附公事無淹思洞中竅要而應變機
尤敏偽包起發覈實二弁肆賄嚇公請撤之而胥數千
人免解獲允滇餉例給銀時鑄錢至四十八冶予銀七
錢三公密請停鼓鑄給全銀戊辰夏楚兵譁伍多耦語
乃亟合省僚宴而陰偵之秋七月十六日夜援勦左協

營噪尋旬飛檄扼平彝交水走黔趨楚道二十日夕會
城復約三更訖掠庫乃潛令監麗譙率擊二更達曙掩
訊首惡夜未既以次就縛立辟十三人亦會偽標無一
人應者事旋定而尋旬噪兵果直檄堵交水兵而敗縛
辟渠八人餘勒歸伍

上褒諭有加并允給銀奏公又請預協餉而滇黔無禁
烏鎗咨功加弁無停用兩迤胥帖公雅覈形勝洩滇移
右協羅平以控黔之木窄關馬尾籠粵之安隆峒而遞

移廣羅協廣西以扼特磨邕管之道尚義平復移新甯
營新平縣而汎諸菁隘及其䟽巡金沙也定擁塲於江
北之木譬灣而請蠲麗江失地賦俾守寶山巨津通安
蘭州籍地無敢却撤雲龍州暨橋後沙溪瀾沙浪汎以
實劍川之拖枝樹苗工江三汎復北勝直隸布政司以
壯瀾滄衛而升永北協為鎮俾刺次和瓦魯之革甸香
羅流土互守營制大定它若護松花垣畫昆陽海口工
恢鎮遠偏橋達滇道築雲南東北甕城又改昆明學祠

王忠文吳忠烈楊忠介纂滇志夫且文武具舉懾蒲緬馴
獠獫而克綜大禮長和羅甸之所啓闢坦綽布變之所督
箕犀革銅盾鐸鞘鬱刃之所淬練朱波栢城產里水尾鐵
橋劍賊格孤魯昌之所環匝都雲銅人爐山落蒙之所貫
絡咸陽黔寧鎮遠之所彈壓劉宣撫王靖遠李長垣朱山
陰之所制置而胥措注而幹運之也洎癸酉
陸見復奏馭番減糧六事

溫諭畱閣比甲戌旋署而拜都察院左都御史之

命矣蓋涖雲貴凡九年秋復

命總督江南江西而公再請

陞見奏吳賦重請如夏稅秋糧例六月開徵又江西民
輸漕兌賦貼官運水次號脚耗後附全書支給而漕臣
題編正項并追徵支給銀米累萬宜蠲又宜復宣樓二
船歲修例

上胥誑部議允之公嘗憫接徵官輒挂初叅例調斤請
改降級畱任而以續完數為差請捐積穀糶三存七請

蘇屬安屬之五州縣胥析年徵逋又請南米俟秋徵而
先撥支駐防營糧并貯十萬石會城以慮儉歲胥允洎
丙子黃淮湖溢乃胥發捐積米貯會城又假畱漕鳳倉
麥凡九十三萬石有奇以賑淮揚徐泗饑且請胥蠲常
賦獲允公以世肄經學文肅公嘗主順治丙戌丁亥己
丑會試雅意人才而江南萬八千餘人試於鄉財中式
六十三請廣解額獲允三之二公又新江寧學季課江
南北江西士獎激尤慤公雅覈河渠始涖任會勘震澤

水道吳淞口石閘黃淮溢又勘黃運隄堰口閘議疏胥
核要比去江南一年嘗治華家口運河祛怪物塞龍口
隄王家渡距大埧千六百赴截溜埧一又一年復涇修
高堰固周橋六埧以限汜光白馬諸湖疏引河於陶莊
閘立東水埧一以導黃環清口而東而江以南羣稚忤
躍日走候埽礎夫且久而見思埽滇崇祀而實克綜徐
豫南徐豫揚江之州部武寧淮南宣歙鎮海鎮南之節
蘇贍軍苗州經制月椿版帳辨額之支移減放支運兌

運改兌之規則淮忠武河南武定程文運憲之行省乘
傳周吉水王餘姚夏湘陰潘烏程之撫疲羸而扞瀕澤
以胥躋之保釐蕃宣之烈也公泣兩江五年以金太夫
人憂去己卯冬晉兵部尚書是時昭木多鄂爾多斯
王師霆掃公筦本兵五年飈歛塵偃間出勘連州徭號
恕允坐曹肅然若無事而屯戍斥候士馬糧械不涖案
瑣而自辦實克繼硃石貴鄉暨近世鈞陽華容蒲坂威
望而以前後二十餘載之經畫邊腹也雖

天子彌隆樞筦寄神用亦寢耗矣甲申亟以疾乞身獲
褒允公修文肅東臯別墅營生塲密雲縣之青甸築清
溪莊五十三年春疾劇

賜醫二月一日卒年七十四

賜祭葬如彝典爰以乙未秋八月二十二日葬於青甸
之塲禮也公娶穆奇覺羅氏

贈一品夫人繼沈氏

封淑人繼趙氏

封一品夫人胥有婦德子一時繹鑲黃旗佐領公嘗兼
轄而以致仕

特賜襲今用才望顯女三孫五宏賓官廕生宏定宏宗
宏寅宏寶公少侍文肅公終日立無敢歌手培金太夫
人瑩以前山頽蛾眉號眉山它日植松九別號九松事
郡統忠貞謹友愛弟精奇尼哈番公食場公兼山公尤
篤撫猶子令大司馬公寧鎮公胥克成立為名臣雅嗜
拯人之急嗜讀書做鍾王米書尤工方大字文章雅蘄

經世務集如干卷又奏議如干卷涖職自員外郎至尚書未嘗獲譴階自資德大夫晉光祿又增級五恩寵斐疊不可勝記督滇黔蒙

上賜書左氏傳世濟其美四字癸巳

萬壽燕國老又手尊顧公

諭諸王是父兄嘗有大勲乃

賜飲沐深恩而叨異數一字加榮九原可作然則麗牲有碑樂石有辭宜直高平盛事譜義莊而續廡祀哉蓋寔

詳肄文肅忠貞暨公制巖疆枋中樞異日史臣紀載之
掌故以稱

聖天子篤念宗臣褒崇勞舊之指而光昭

太祖

太宗

世祖之聖德神功於億萬禩也先君子入翰林寔忠貞
公教習士而某編齊氓景徽烈爰諾佐領君之請次公
行事如右而系之以銘曰

嗚呼是為

興朝功宗臣范文肅公喆嗣兵部尚書光祿公之阡蓋
先憂後樂寔祖文正恕人責己寔宗忠宣滇黔紀多勒
於藝鼎兩江敷頌被諸篳弦北斗喉舌之任西省樞機
之權今佳城兮永閉維崇閎兮載綿後有考者且胥瞻
鳳山之嵯峨聽清溪之潺湲而慨然太息於世臣之流
光錫美以徵丹篆而耀絢編

陶子師先生墓表

康熙壬子後文治顯融公卿大臣多喜賓禮士望實雅
稱輒俾得所宜得以去而議擇置尤者於甲科侍從之
班繇是京師號多士丙辰常熟子師陶先生棄提舉試
慨然北遊一日而名動省院邑司寇翁公崑山司寇徐
公殿學徐公尤重之都人士爭屬目先生而先生雅剛
挺多所齟齬及舉博學鴻詞或列其名以上固稱疾不
就甲子吾郡侍讀秦公主順天試中式第七戊辰會試
主者定第一策疏會推之弊語侵執政用此名少後然

海內士胥曰陶君臚句甲選也而貴要亦有欲為先生
地者遣人鈎致之先生不應是時殿學監修明史蘄留
佐編纂勸少貶徃復三日夜卒不應殿學太息而止及
殿試奮筆條畫中及蘇松田賦曰願減浮額之糧罷無
益之費讀卷臣僚胥壯其志而以言之少戇也置二甲
既而隸吏部銓海內惜之先生雅不屑意策騎歸越二
年兩徐公亦先後出國門禮士者寢怠而司衡大率鹵
莽矣嗚呼先生名元淳其先繇崑山徙常熟祖士奇父

世澤贈文林郎母葉氏封太孺人先生少雋敏工制義而嗜古志蘄經世洞見史傳理亂機要其議論雄闊而歸於崇本覈實其就銓也掣廣東瓊州之昌化甲戌夏六月涖任首得浮糧六百兩有奇嘗以水患詔臨高代撥而籍亡於苻南蛇陳武之亂者牘上請豁輒格乃定賦役均糧以畝均役以糧罷徭差革襍征自坊里供帳始予墾荆榛者牛種不責其租或課藝藍蕪闢市通商榔榔諸稅胥蠲之而遇黎尤有恩揭榜山崗俾得自詣

邑訴理土舍弊始絕同權量度市始莫之欺繇是氓黎
寢蘇流亡歸者趾相錯而先生牘論浮糧不已勾稽蝕
簿搜缺碑譔昌化浮糧考上之又嘗議徙治小豸嶺藝
筍竹為城返英德戍置營小神山嶺又密上儋州白沙
營之變既而計降其渠請釋之以招支黨又請州縣兼
轄操軍雖不盡用而巡撫高公才之他郡疑獄多下昌
化又令署崖州篆再署感恩嘗語僚屬曰此日市東韭
縣令也慎無索餉遺高公故與崑山隙嘗厲色俟先生

者也按察劉公貪雷瓊事成公亦亟稱之先生理崖感恩胥視昌化而崖州禦驕弁尤力嘗牘列游擊不法游擊啟總督下瓊總兵平之先生申牘曰私揭不應發審鎮臣不應侵官卒不往按守備支解人獄甲士百餘佩刀突入左右皆驚走先生叱令無動直視曰守備反邪奈何用甲士劫持訊鞠自若守備遽麾去獄卒決先生至瓊總兵輒榜牙門曰無生事蓋先生之泣瓊南也煦嫗瘠弱暇與諸生講說環坐嘗滿而挫弁卒之悍贊暨

胥役之操上官符檄而縱者不少縮懼制府以下多不
悅卒用名高雖亟乞身得無去及代撫蕭公褒慰甚厚
最後布政魯公許釐正浮糧且與蕭公議列薦奏行上
矣而先生嘗禱雨峻靈山雨立降遂得寒池疾勞勩寢
劇戊寅秋九月十三日卒於瓊之儋州巷年五十三先
生制義與長洲宗伯韓公翁公胥為學者宗古文詞英
剴不規撫節奏而自合集二卷又南崖集一卷嘗與殿
學徐公揚擢明史蘄單行一書而不克藏誤列傳三十

餘篇司寇徐公總裁一統志分志廣東六卷嗚呼以先生之才諸公之雅鑒而當朝議士望若應桴鼓之時其於要職華資暨世所詫甲科及第疑可操券而得而卒莫之得也昔宋乾道八年策進士奏陳君舉第一不果用及紹熙中擢陳同甫第一遂甲古今諸及第者而光宗亦大喜曰朕果不謬覽先生雅志經世類君舉同甫顧殿試不類同甫類君舉而又不如君舉之卒階館閣雅不厭海內望既無以厲士之自重且重啟異時公卿

衡士黑白錯置之弊俾駢稚荒傖胥駕才之秀偉絕出者而闕其口而其餘之雅宜得而不得者且日以滋甚此可為之深惜而累唏也及其從常調羈吏職復得儋崖萬里獸駭鯨魑之地而忌嫉者且滋衆及政行海外中朝閤部省大吏既雅知之矣蕭公今又在日月之際而先生不幸復罹癘濕以卒訖不克展其志故辛巳之列葬文林塋也秦公既謨誌銘予今復刪次其畧叅考家狀暨先生文而表諸大河之阡先生娶鮑氏封孺人

子二貞一翰林院編修貞靖國子生蓋葵之十有三年而
覃恩贈先生翰林院庶吉士且以例加一級繇文林郎
晉階承德云

書澌洋先生之墓

澌洋先生姓牛氏名兆捷字月三澌洋其號也澤州高
平縣市王里人世系詳先生自謨家傳先生骭髀負偉
節少學於里頡雲畢先生博觀史籍制義雄一代古文
辭尤驚削齊鑣畢氏西北文間擁論海內士惟嗜雪苑

朝宗侯氏餘子不屑也先生之學以經世務為宗尤研精宋永康陳氏之說孝宗四書文公成公諸往復文翰日唸誦不輟善推闡三代暨漢唐宋明國勢濤湧霆轟視中興酌古論惟肖康熙乙卯以禮經魁承宣司試出先君子清源公門墨藝颺馳海寓名籍甚陽曲傅公他先生蔚州魏敏果公一見輒器為國士澤州陳文正公嘗歎曰吾鄉第一才也已未雋禮部試出鄞介眉陳先生門用贈公疾罷對策亟歸先生喜論事嘗走臺司條

列會城南鬻醴價宜大訾省豪賈齟齬之幾獲禍不少
悔醴價訖減乙丑策試成進士辛未銓注知廣西灌陽
縣克勤其官以廉著讞訊立剖徭獍懾服湘灘間承學
士如文解唐時梗輩數十人胥就學獲聞明先正決科
指粵大吏才之甲戌檄署全州事夏五月歸灌陽觸熱
卒距生前癸未年裁五十有二歸葬市王背嶺之陰武
夫人祔陳文正公實謨誌銘而墓碑不克建先生子三
伯道宏偕叔道肅胥高才生仲道遠雍正癸卯舉於鄉

澤潞望士也孫曾孫多籍庠校先生歿且四十年為歲
癸丑而肄業江南荆溪儲大文子從長平肅拜墓次茂
才孝廉君胥屬曰書碑子任也爰不敢辭而先生名俾
兒履涵書之且竊附唐李翱皇甫湜李漢之義叙先生
瑰行邃學概略而系之以論曰

先君子解江南試以策論伏一世涖梗陽焯著廉能聲
而其它海內士工古文辭而又雅克經世務者南昌躬
菴彭先生有大略為西江人士冠寧都水叔魏先生尤

工古文雅類宋眉山蘇編禮頡雲畢先生文擁管子匪
偽房梁公注比餘姚梨洲黃先生克緒宋元金華之學
崑山亭林顧先生諳歷代掌故鄞李野萬先生尤諳明
掌故檢討富平天生李先生詩文壯慨知長子縣蜀鑄
萬唐先生善言兵之變孝廉燕崑繩王先生南豐質人
梁先生胥學於冰叔先生善言兵質人先生尤諳西陲
事知昌化縣常熟子師陶先生討論明史錄尤嗜江陵
張文忠公集而澱洋先生學於頡雲先生又聞先君子

之緒論上下古今千百年得失理亂洞見原本抉擿宋
明所繇削雅類燭照數計此十數君子者藝苑胥有赫
赫名而其學又克適於用所謂千人之英曰俊萬人之
英曰傑者非耶而其它于一平叔西溟諸君子裁用文
字著者不論也夫今之為古文辭者視明為正而明代
工文士繇陽明握密機荆川講經世業浚谷鹿門談兵
外它亦尠洞解樞要者此以徵川呈岳貢之才之雅克
尤盛也然諸君子中惟韻雲先生位至藩伯要亦裁托

文字以自娛其他雖如澱洋先生成進士籍南曹斬當
世人士之無裁以柔翰功名品之者蓋亦尠矣夫袖不
克長奚繇善舞嗚呼惜哉

麟洲沈君墓表

自唐蕭李後而枋藝苑者格彌峻宋穆柳培文壘黃陳
楊蕭畫詩鵠至明而吳北郭之十子閩之十子二元輩
輒曰我家詩英景時之十子雖以金粟公子不敵海涯
二布衣其尤盛而為孝武時之十子又為七子永陵時

之前八子後七子而弇州藁又有前五子後五子廣五子續五子末五子又遠近游從四十詠號為藝林中極盛奔走寓內且突過靈濟講席五千人晚而為雲間之十一子又為六子金精之十子又變續而為雪苑之前後六子數十年來人文益茂山陬海澨士多來遊於京自庚辛間之十有九人宿儒元老胥列而英游滋甚予嘗舉姚文毅公語以揄之曰芬華綺麗之中隱寓鐵幹冰稜之氣其克符此者裁得數人如海寧麟洲沈君其一

也君名元滄字麟洲號東隅海寧人祖家錢塘少穎異
好學於經得之應嗣寅萬充宗二先生於綜贍吟詠得
之西河毛公竹垞朱公暨葑園丁公於制義得之從祖
昭嗣公而於書法得之外舅少詹事聲山查公少詹公
以從臣供奉且不翅內相而君為李南陽之程克勤岳
潯縣之李賓之董會稽之陳約之名日以起康熙乙酉
北遊副雋府丞試座主東川汪公重惜焉丙戌試教習
樹峰孫公雅激賞其文時少詹公分纂佩文韻府命門

下士蒐採君薈萃而排比之進呈輒稱

旨丁亥冬公不祿君翼喪南還蓋徘徊澹遠堂而時識
西州之痛也比復遊於京

命入武英殿書局藏韻府工復分纂韻府拾遺鳥獸蟲
魚疏月令輯要諸書克勤其職雅望籍甚先是部院館
閣多靳擇士士亦爭以才顯君尤為醒齋李公寒溪周
公西崖湯公他山查公暨族祖心齋公所知其從容譙
詠日揚擢文史則萬九沙黃主一廬六以林吉人方文

轉諸公分承書籍則約齋張公而總裁陳恪勤公尤器
之曰博學精勤沈子為最書彙成不少更易恪勤公性
擴裕尤喜下交寒素士雖小集魯酒罔不與而君在書
局昕晡晷刻暇然間聞雅集雖薄暮輒疾走輿至語
不繁而指胥勤懇旋以金吾禁輦歸蓋靳纘雲間雪
苑以彌振海涯布衣之逸軌而匪溷趙張朱原之徒奔
逐形勢又若選舉志科名記所附書太平御覽所載覓
蘇張見王竇彈陰施陽設之變態裁博一朱衣吏堂前

跡為榮又或求交七錄竊附國儀始而走婁江西塞之
遙途而終則禁名袁公客又具甚者則曉聚石鼓宵隱
浴堂而已此君之與友朋讌集所以尤拳拳也丁酉復
副雋府丞試座主張清恪公重惜焉辛丑書胥藏叙勞
命知文昌縣君過淮謁恪勤公乃涖任本經術為吏治
吏而名籍校者懲之婢而錮者禁之建倉十有九楹貯
粟條行宋崇安社倉法萃秀民月試甲乙精覈斷振文
昌明三倫氏峻科之緒士民德之號曰召父又攝會同

縣治如文昌而不善事上官又嘗與會同官隙遂被構
劾豈鐵幹冰稜之氣裁宜寓諸友朋讌集間於仕宦雅
不宜邪而第恐歎語移日者之業以貌比而神睽也君
生湖山水玉地嘗泛澈浦陟鷹窠絕壁爭雄華頂處捧
檣渡海蓋蘇端明所詠茲遊奇絕冠平生者晚羈棲寧
夏而賀蘭千嶂宿冤鎮遠之形勝尤雄遊覽日富交日
廣其所更世故盈虛消息之變亦日以析且密故撰述
帙日益而於詩之汭波討源暨劉後村所謂難於問性

天者自得尤深著滋蘭堂詩集二十卷文集六卷闡應
萬禮學著禮記類編二十卷又雲旅詞念舊錄奇姓編
充安齋雜著令雨軒詩話杜詩補注彙若干卷其渡海
而南而營畫於瓊臺五指之間也又著黎岐雜記平黎
議若干卷君晚尤邃易自號晚聞翁癸丑春正月竟卒
於寧夏將軍傅公飲賻之喪乃克還以某年月日葬於
某之阡子廷槐心胥籍於校廷芳籍六館校勘一統志
以試博學宏詞授翰林院庶吉士又授編修胥

贈君暨查孺人如彝典予爰表君墓抑以訖君東山復
作之思也至於氏系之詳行誼政治之實暨君之所以
膺異數而啟畀奕滋衍之祚者則編修君述君行為尤
覈雅云

贈翰林院檢討伯安萬公墓誌銘

列子叙九坊歟相馬索之牝牡驪黃之外而世多索之
牝牡驪黃無惑乎駕蹇且盈廐而寢疑八駿之雅不如
駕蹇也康熙辛酉予年十有七八會城見茂才伯安萬

君手虎頭猿臂表辭輒奇之既而伯安貢成均旅京輦
駢語韻語蜚聲藝苑江南曲海棠賦尤楮貴鄧季野萬
先生有人倫鑒時指語座客曰此予宗千里駒也晚而
遊金城平西頌辭出秦隴人士駭未曾有巡撫石公亟
幣聘命子肅師之此真駿軼士匪牝牡驪黃埒也伯安
為司訓古齋先生之六世孫大宗伯文恭公之五世孫
茂才野亭公之伯子華閱素少標映江左今書其雅克
勵行檢者曰事野亭公暨母吳孺人罔少讐禮也曰俾

弟茂才君有後也曰肇造三世祖耕隱公祠也曰造古齋先生城西專祠也曰修文恭公書院也曰彈力營畫野亭公祠於宅東一吟軒之前且旁植蓮卉也曰蘄建始祖默菴公寢室也曰蘄復建文恭公黌宮前綽楔也曰蘄復祖顧菴公城西宅也曰宗女卒於畏而堅却其夫家朱提百兩也曰力全從姪茂才君妻蔣節也曰肅誨子暨孫且俾讀文選漢魏古文辭也此黨邑所胥挹而未可以為牝牡驪黃而輒渺之也公孫龍子曰堅白

石三可乎曰無堅得白其舉也二無白得堅其舉也二而之石也匪三也夫堅且白者心也心其真也石則其迹也乃世不蘄其果克堅且白者而好執匪三之石以律人於是乎贗士滋熾而其舉二之克真者反用此摧挫黥黥而不復振伯安試場屋十有一胥報罷己卯府尹試毘陵黃功錢君力薦之慈溪西溟姜先生激賞不置定中式上卷洎書榜為偕典司者潛易去伯安感西溟先生知己日省視其艱阨不少倦而科舉文業亦繇

此寢輟矣洎齒七十復走數千里作臯蘭可寒遊以武
徐文長吳子魚阮太冲諸名彥荒徼孤堆清吟叢編之
學殖人且重用為天道疑迺颶譽四馳社祐亦寢集而
伯安君克勵行檢暨其才峭出而不諧附於稠衆者之
涯畧遂日以融朗此所謂天定者勝人也伯安子三先
卒者景儔國子監生其長也次松齡出嗣弟雍正己酉
中府尹式第四乾隆丁巳考

授內閣中書舍人試博學宏辭第一即

授翰林院檢討供奉

武英殿校勘經史才譽焯著又次椿齡上舍生孫三秋
期汝馨汝鈹秋期上舍生校釐三禮例族銓叙曾孫二
之鼎之環女三長倩尹必達籍校次潘輔龍比卒嘗籍
於校篤學工文士也次史鷺序孫女五伯安卒於雍正
四年癸丑夏四月十有八日年七十有七卒後四年

覃恩例得

貤贈如松齡官松齡等將以某年月日寤於項豆之阡

來蘄誌銘予爰謨誌以徵士之雅克堅且白者訖非牝牡
驪黃所獲掩若夫世系暨配冢介婦暨孫女字某氏之
詳載松齡行狀不繁列銘曰

魏公子年醴辭云無意則心同無指則皆至又云髮引
千鈞勢至等也而後知伯安君之尤嗜文藝克啓厥緒
者蓋匪一縷之垂而直千鈞之繫此之謂駿軼磊犖士也

陽曲醇行振公張先生墓誌銘

予客晉陽曲張子耀先簡請曰先君子性醇實雅不事

華譽歿而斬名非先君子志也惟是隧道勒銘晉宋以後儀有之洎唐宋而高文焜耀寔與史傳相經緯若不懼陵谷變遷而并千百禩望族之家儀賢喆之紀錄胥俾闕如人子之心奚以少慊曩承先君子命肄業於夫子也敬勗不孝曰此而終身重幸慎毋須臾緩間問所聞於函丈者輒俾書諸籍今籍記疊疊而先君子曾不獲見不孝學殖之少進而遽棄寢除矣此九旬以來不孝所以亟欲跼請而痛不成辭也惟夫子哀念之予誦

訖戚然良有慨於中既又誦其行略義綜史籍匪苟焉
而為之者迺亟藏弃而鐫之篋以歸時蓋雍正十年冬
十有一月也洎十二年春正月耀先簡再至迺發篋而
少刪益其辭以誌陽曲醇行振公張先生墓先生名翮
字振翎晚易振公其先濠州人明初天福以武勲授晉
府指揮使護恭王至晉遂籍陽曲子祿官晉府紀善繇
紀善而下凡六世為先生曾祖文英娶李生紳我

朝拓謚晉疆籍於庠娶劉生志遠餽於庠再世以宿望稱

邑里虞庠公娶王孺人子二次殤長即先生也張氏繇
始遷祖而下嗣世系者胥長子洎先生裁系一人昌黎
韓氏所謂形單影隻而又不逮其兩世之一身者也先
生少習科舉業甫試以王孺人病輟時祖哀髦虞庠公
出授經遂代綜家枋蘄曲叶祖意因輟試而性寔嗜書
暇輒繙校雅通經史大義工楷書雖匆遽中不妄抹一
筆又以母病久不瘳尤習河間東垣丹溪書復自立藥
室其後論人疾率克中然不以醫名嘗曰此事差之毫

釐謬以千里奈何以人為嘗試乎諺曰學書費紙學醫
廢人先生工醫而不業醫而楷書雅工其妙克味諺辭
哉先生事祖父暨母謹王孺人疾發輒憂泣日檢覈後
藥侍疾凡十餘年始卒毀甚而喪具率曲叶祖父意服
闋祖卒不數晷虞庠公復卒毀而喪具率備禮或曰貧
宜從儉輒泣曰惡可以一日之儉貽終身悔也先生甫
綜家枋叔暨姑卒尋弟妹復卒葬率如禮而悼弟妹歷
久不少輟其後女婦暨二孫卒或曰無子者殤者不宜

祔祖塋先生曰禮有正葬有殤葬奈何以謠言隳倫紀乎訖準禮葬之此宜載風俗傳家儀諸書者也先生性
勘營競好周戚友急不疑人欺亟遣訶侮而胥以和鎮
措注之虞庠公嘗寄貲於戚某比卒某懼償貲陰構釁
先生請代司喪紀若不知有寄貲事者某復駕言物價
未償復稱貸償之釁廼寢此先生置曩事不言而它戚
友間泄之者也鄰右某利先生宅會虞庠公貸銀百四
十四銖某久置不問比虞庠公卒迫索之先生因質宅

前闌屋若雅非已有者比某歿廼贖之計息且二千四百銖矣先生嘗問語耀先曰吾非不知早為理論恐事出意外耳而宜深悉此意先生藥室業差盛某計攘鄰右復構之亦竟棄置不復較先生卒前數日嘗手摹長畏二鉅字越一日復書聯句示耀先曰聰明藏於渾厚中正出自和平此胥可編劉文饒陳仲弓傳廼先生禔躬馭物之繫略也先生雅善戚恕菴侯公侯知餘杭延至署先生多所匡拂然不為事羈間遊洞霄韜光西溪

諸勝後侯疾為言醫藥乖誤復觀解官煮身計遂力辭
歸或曰若脯資何先生笑曰予之來淞以錢塘名勝甲
天下非為脯資也挈囊輒行後言胥驗侯氏子姓雅感
情厚而太原人士亦胥歎其識量焉先生晚而產日落
長子復旅外或謂耀先宜徙業先生笑曰是子惟讀書
可耳且貧富有命雅不闕讀書事時出先世度藏書俾
展誦聞佳書必力為購之嘗語家人曰吾少黜懽趣令
老矣惟此子克續先世緒勤讀書差慰懷爾耀先補博

士弟子號高才生嘗分績晉志三晉人士胥推該洽翳
先生之訓也先生於近世醇儒尤尊壯其顏氏措臣史
氏書日事繙玩輯有師善錄暨張氏集驗方如千卷雍
正壬子夏閏五月先生獲疾十四日晨語耀先以家事
之要索水漱浴逾午步庭中危坐而瞑距生康熙甲辰
十一月四日年六十有九矣先生配張孺人有孝行子
二長效先娶賈次即耀先也娶柯繼某女二適韓惠章
紹良胥邑里世族孫仁安殤孫女一字柯氏耀先卜阡

於邑東十里之六龍山麓以癸丑乙亥春某月日安葬
予既書行略辭訖肅然而歎曰嗚呼此陽曲醇行振公
張先生之墓也復系以銘曰

龍山之阡岡迴川長永綏後嗣克鞏克昌

節烈劉母蕭孺人墓表

漢中壘校尉劉氏之列女傳也魏晉後皇甫氏綦母氏
劉氏之續傳也項氏暨唐魏氏之後傳也此胥隸於嘉
則四庫之書錄者也而比者武岡劉母蕭孺人實宜續

書焉孺人茂才萬選公之女四高才生之女兄碩德春
臺公之冢婦選士近安公之德配文學允悅允周之母
而國子上舍生凝一之大母也孺人生十有八年而歸
選士君生子允悅又生允周年二十有六而選士君卒
允悅才六歲允周四歲孺人斲死而不克死既而明柳
樹澗賊破武岡春臺公從兄子靜甫公以援勦秩攻州
城熱死譙樓賊議盡殲武岡人兵且至孺人自經再而
不克死自刎其耳自劓其鼻又不克死而不翅死而春

臺公廼獲殫其貲以克拯武岡數萬戶於死而允悅允周亦幸獲偕不死也既而海寓靖謚孺人少綜畫故業允悅娶於朱生子三女二孺人時撫而泣曰吾夫庶其不死蓋閱三十年而滇賊作孺人偕家人暨武岡城桑園人萬口有奇胥避匿銅鼓巖暨洞口袤六七里之山峒蘄無死而賊用火熱萬口有奇者八九死允周死允悅子女胥死朱孺人死獨孺人獲家人潛峒外者力拯武允悅出峒而死而徐焉獲無死而母子子對之不翅

死也既而事平允悅復娶於夏氏生上舍君凝一孺人
時時泣曰吾舅吾夫今誠不死矣蓋凝一生二十有四
年而孺人疾卒繇是環溪峒婦稱暨永之東邵之南容
融宜之北梅之東傳語岷州風烈者胥太息泣下曰是
宜書古列女傳而烏頭綽楔之典之褒旌楚南女士也
爰亟尊孺人焉凝一游吳越京口冠伯張子手孺人墓
誌銘視予曰是宜續中壘傳予爰表其墓以揭於大雲
楓門之介而并揭示容融宜之又南梅之又西俾知葬

典之所以導岷獠者滋捷而遠也謹表

孫孺人墓表

嗚呼此歛弁溪南吳氏孫孺人之墓也孺人以雍正二年十一月二十有六日卒二年二月某日葬某原予謹表於阡曰孺人歛巖鎮孫公克明女溪南司訓吳公繼室前孫孺人卒稟文林公命禮聘焉年十九而來歸吳氏自唐左臺公世望宣歙道至明戶部侍郎贈尚書公為定陵名臣雅傳素業圖書四壁司訓公尤以文雄於

歎孺人歸而公時授經容山孺人事舅克養厥志肅烝
祭睦如媚邨婺推胥無訾禮司訓公嘗歎曰是善伙佐
我洎序貢於庭瑛銓司訓益縱游它郡邑自號寄菴歲
壬申卒時子佐康業籍海州學昌仁庸儒慶甫冠煒裁
八歲孺人晝哭之餘敕專肄誦洎昌籍徽郡學復命挈
煒暨佐康子苞孫越溪關詣予邑誠曰爾家世業儒尚
靳益從賢師友游用擴襟識乎吾雅甘疏糲仁庸自能
營辦爾曹無憂也繇是佐康昌師先叔祖在陸先生而

煇苞孫從予游時偕肄業者司訓群從侍御篁邨先生
巖鎮今知榮澤縣牧庭汪君暨予兄弟輩也後佐康昌
胥餽於學標望江南北佐康復暨仁庸儒慶籍國子學
胥為良士而煇寄籍澗仁和學苞孫籍杭郡學儒慶子
華孫亦越江詣白沙師予暨在陸先生孫曰虞年十一
籍徽郡學十三食餽庚子煇中澗江試式時主試今撫
西粵閣學臨川李公紳彥銓鑑倫紀模楷而副貳者今
侍御檢討睢州湯公同試者知華亭縣慎菴張君胥海

寓雅望也迅足至孺人泣語煒曰爾父未爾見而客客
八年而爾孤今寢三十年爾甫雋恨爾父不克見也又
曰士罔滯志學罔停機爾曹尚益勉之昌煒等胥泣受
命壬寅郡邑拔貢華孫冠選時提督江南學為令湖北
承宣侯官鄭公雅著清望者也煒華孫嗣入都才望焯
耀煒獲挑知縣事選而疾注銓缺偕華孫驅蹇歸蘄討
索其所未逮它孫曾亦多穎懋蘄緒世學然則左臺之
系其益衰衍尚書弁溪之里第其行益閎闊乎而孺人

欽贊警誨以克庸於吳氏者抑可謂鉅矣昌女字章歧
汪氏未行而汪氏子卒正守二十年縣府司院胥允
題旌然則孺人之教蓋匪直被諸子若孫而聲必柔服
必整爰以勤宣女誠者其型肅於矩矱而其應符於桴
鼓也孺人雅重祠墓節序上冢祀三參公祠必潔必恪
蓋六十年有奇而訖帥厥初副室方生子殤命子仁庸
金生仔莊撫視尤篤孫氏後產落迎父暨兄以歸以養
以殯嫁弟女畢氏而復命仔莊子芮孫娶其女此又蘋

藻之職業樛木葛覃之義指也孺人性嗜善溫如煦
如待臧獲胥有恩意而雅不喜浮屠氏言迹不履禪寺
泊末疾棘醫來診起坐正容曰氣聚必散天也且吾年
業八十有四焉用醫又敕曰我幸無大過不須懺悔爾
曹宜遵禮無以鉞咀溷我遂卒然則孺人明識遠越閨
幃雖儒林之篤信守道者度無以尚豈直生封石窆沒
祔南城俾中壺外姻忤秩高而榮典緝云爾哉孺人子
六佐康先卒昌出後世父司理公仁庸仔莊儒慶煒孫

八苞孫蓮孫芝孫萬孫芮孫華孫藻孫莢孫曾孫四待
詔奉詔御詔元詔女四孫女七胥歸士族唯字章岐汪
氏暨幼者在室曾孫女二嗚呼昔在陸先生以尚書百
年世譜且佐康昌之敦請也爰謨司訓公傳令孺人卒
煇苞孫華孫持昌哀述亟請而予尤懼無以慰佐康於
九原爰不得讓敬表其墓以附漢大家秦宣文傳後俾
過者胥式云

鳴周葉子墓誌銘

葉生蕭鳳字鳴周少而穎異年十四補博士弟子員後
從予遊宣州南沙比予纂晉志鳴周來飲佐其成又入
中丞石公署授經甚肅會

詔舉博學宏詞中丞靳用鳴周應

詔尼之者以非晉人止鳴周尋遊京師而京師士胥挹
避少司徒臨川李公激獎尤至曰此真綜史編而克具
精識者中丞聞之卒用鳴周應

詔而鳴周遽疾卒於邸舍時乾隆丙辰之秋八月二日

也蓋不惟不克試博學宏詞而并不克試府尹京師士
暨邑里親知胥悲之予不獲已而強解曰鳴周年裁三
十有五父老妻未克舉子嗚呼噫嘻奚以死哉予邑繇
檢討陳公後膠校士詞望一二遽烜赫於制撫重臣暨
海內鉅公名再三簡

帝聽京輦振動未有逮鳴周者也是雖不克試而業已
中雋也爰書此以紓其父暨妻之悲銘復揭曰

予所以誨士雅不止此而鳴周業寔得其槩庶克備一

科而釐二十二史嗚呼噫嘻今其死矣雖窀穸之不時而不可以莫之紀次也曰此古之陽羨篤志乙部史編士也

祭告文

祭何義門文

嗚呼先生其學至博而約以守之非縱橫技術之所能雜其鑒至慤而精以運之非名例科律之所能程無所不納而時拒之而翕納渭濟之派無所不如而時吐之

而微茹蕙鞠之英詩格三唐字畫兩晉而綜厥略旁
暨瑣末胥克祛俗而正雅裁偽而崇經嗚呼先生昔者
楊學士之早結主知劉侍讀之驟屈廷議當時宿老宗
工且咨嗟動色而先生

賜第贈秩終始褒榮三代之直道彌耀九域之公論常
平至若屈信互倚得失交橫屬在友朋從容燕坐蓋嘗
以趙餘干之寄語於僧寺董萊城之畱語於邸舍者相
與曲喻而旁徵先生亦慨然太息指數今古凡孔英片

辭伯璲列牘未嘗不稽其易按之迹而發其難顯之情
迨至壘峙潦清事勢錯出而先生言卒多驗則夫以拒
為納以吐為茹夫固用之於隆冊厚帙羣信之而不疑
者其神業不可謂不克察而用之於注式選格羣爭之
而不讓者其識抑不可不謂克貞也嗚呼先生百年閃
忽千載崢嶸翕熱之態既非高明之所雅喜而恢廓之
器又非駑鈍之所終勝惟是晨繡宵校矻矻循循而凡
籍末學祇清誨所謂我老將休付子斯文者抑何以緒

洞山之燈衍崑崙之葉而迄俾吾道之考鼉而鏗鯨也
嗚呼先生維水也潔維玉也晶爰薦辭兮無愧儼昭格
兮有聲

祭吳霖蒼文

代

嗚呼自前又壬午先侍御公偕君先司徒公胥舉於鄉
而肇啓兩家之好越百有十年為歲甲戌而君偕伯兄
茂才諂臣君暨侍御篁邨先生榮澤汪君來肄業於先
在陸先生君季弟覲揚茂才君子又臯亦肄業於大文

君之辱臨予邑也實假館城西南天藜閣閣面荆南山
右俯荆溪地差蕭曠芝時偕君一室學大文在文暨伯
兄素田李弟汜雲時時登閣縱論古賢喆詣業藝文源
流利弊而君尤號凝肅不輕發一語吾黨雅欽企之丙
子侍御先生雋於鄉君偕榮澤君試輒前其曹君遂餽
於庠廼延在陸先生館廣陵東郊外之存園水木森碧
學殖日新某暨在文實侍焉癸未侍御先生成進士遂
陟蘭省丁亥在陸先生夢奠兩楹君來弔相向而哭滋

端木植楷之慨戊子榮澤君雋於鄉己丑聯雋侍御先生遂陟南臺辛卯侍御嗣孝廉君復雋於鄉某時授徒邨塾大文在文亟北轅不獲時與君相見丁酉君館廣陵大文館白沙君弟司馬君子冠山亦來肄業君時時拏舟過訪獲究極其議論大率君之學本於鄉雲峰師山諸先正而以刻苦諳世務屈首諸生久文彌邃行彌修望亦彌尊嗣茂才君任家督綜畫審密誨子姓尤肅喆嗣沈篤嗜學女克正守節尤高大文嘗誨新安溪辭

以頌之庚子覲揚雋於泐壬寅冠山選貢成均丙午獲
雋於京北海寓人士望君胥謂漢時公府州牧舉唯君
克膺茲選在文嘗一再過訪丁未秋大文特訪君於廣
陵孫氏館而君先十日歸類相避顧不圖君之終不獲
見也古詩曰風流雲散一別如雨茂才君姿最英忼年
不逮五十最先卒侍御先生注病籍歸歸而病不克愈
辛丑秋卒同時登天藜閣者汜雲年最少乙巳春遽病
卒於京邸素田亦相繼卒茂才君子又臯肆業時裁勝

衣餘二尺丙午亦遽以諸生卒榮澤君不慊厥志獲膺
社祐吾黨亟斬君克恢衍在陸之學而君年不逮六十
今歲復疾卒廣陵館時唯芝之子掌文撫匱一號芝老
且病忘同時講學校文之士半化為異物其復登在陸
草堂暨參翔天藜閣存園者率髮種種白而大文在文
胥虺然爾病追數曩游惋慨何極此所謂誦古詩而潛
焉以泣者也語曰閱人成世詩又曰去者日以踈蓋自
甲戌以來三十有五年裁逾一世而人世倏幻死生聚

散之不可究詰若此又况窈窕茫茫且亘穹壤而莫之
有極耶此吾黨所以指數甲戌迄今三十五年紀游之
雅暨前又壬午迄今百五十年之世譜而涕且綆縻而
不獲收止也嗚呼不腆束芻之奠祇薦靈筵其謹侑之
也不敢貌言而質言

祭吳芥亭文

嗚呼昔乙卯丙辰間伯兄寧德府君實克偕公肄業於
先叔祖在陸先生而始啟兩家之好是時中丞潘公上

舍陳君偕公胥以文名邑里而大文在文齒尚蒙稚公
幸不鄙棄實折輩行以交之丁巳伯兄舉京兆試戊午
公亦以尚書舉承宣使試行卷程文颺馳海寓而伯兄
偕公胥久淹於計軺公益嗜古工詩古文辭講肄經世
諸編不少輟丁亥伯兄銓注京山公亦次注陝西之韓
城秦吳濶越不獲時通音訊惟聞公涖政循聲懋著寢
與桐鄉密縣埒操逾冰蘖尤有懸魚留犢之風未嘗不
重為吾道喜而歎在陸先生之教之克行於及門也既

而在文客遊京師大文繼之癸巳伯兄以卓異至擢知州事旋入閩乙未公亦膺行取格至

天語褒嘉額外特授主事旋正戶部浙江司銜一時賑梁城蠲漕賦綜畫審密讜議侃侃南省西臺諸公胥謂公才可大用班行多屬目在文緣邑里雅故尤勤造邸舍遂申之以婚姻而大文郁文暨季弟汜雲亦時獲過從追數昔游則業忽忽四十有餘年矣癸卯公以精力差耗力注病籍歸伯兄暨大文在文亦先後還里閑每

風日清美公時招集室右此君軒摩竹玩卉間擁談在
陸藝業而太息於中丞上舍之不可復作去歲秋伯兄
不祿卒卒歎懣迺裁逾浹暮而公復以噎疾繼之嗚呼
今而後大文在文復步軒前雖欲不誦車過腹痛語何
可得也公年七十有二不為不壽位列大夫不為不貴
詰嗣少尹暨文孫上舍諸君才譽紛綸且益振文肅武
城吏部之緒而大文等顧瞻邑里蒼望凋落輒為之潛
然雪涕而不能已抑匪止以親知之雅夙敦而聚散之

迹亟變也嗚呼陳詞有既結思靡涯惟精爽兮如存儻
陟降兮時格

題三弟禮執神主告文

嗚呼昔弟之陟三山也穹邃為知己奚翅胥一世之士
而頽屈之而訖不能以其身一日少安於羣玉東壁之
上此所謂士不幸而才雖蘄處才不才之間以逭於世
之雕刻訖不可得而天實誘之亦越輯厥志底厥正幸
而青黃犧象之訖無或逮雖有工雕刻者於此不得概

挫曰不才此則肄經講義之力繇古紀之而才者之雅
不為滋戾也今書神主爰以棲神而窀穸亦行卜矣是
格是安以利後人雍正己酉十二月二十有九日己巳
謹告

題董孺人神主告文

嗚呼昔丙午三月二十有一日孺人疾卒而窀穸今尚
不克卜予嗜質昔不敢述孺人行而今畧書之孺人卧
左右向輒竟夕不少動予嘗恐其氣脈之輻滯而孺人

訖不動夕聞雷必側卧雷竟夕訖不動紙有稻莩甲必
掇訖乃敢用生於南少從外舅中憲公居秦之三原晉
之沁水玉林寢十年長而嫁於南而雅樂居北地曰北
人直始理家時費一錢輒度一日居予家四十有七年
而身訖無完褖襦比予成名而飢寒滋甚其餘不能槩
書也嗚呼今百所思先作神主以俟窀穸之克藏以無
俾終淹而紓於暴露之讐其責滋亟嗚呼孺人棲神於
斯凝神於斯尚克永安止尚克永延止昔曰我其克成

室家又曰其汜有成自今尚克肇端止雍正己酉十二月二十有九日己巳謹告

誄

湯學士誄

康熙六十有一年春正月二十有六日

皇清經筵講官翰林院掌院學士兼禮部侍郎教習庶吉士西涯湯公卒廷逸羽儀士亡模楷楹奠飈集巷泣雨灑嗚呼哀哉按鄭司農注周官誄積累生時德行也

而禮記注亦曰列其實行謂之誄漢列侯薨所司奏誄
策應劭曰賜哀策誄文也蔡邕獨斷又謂以策書誄其
行而賜之近世臣僚喪禮尠用哀策而誄自春秋達於
士凡雅相識者胥得謨誄况公以學士兼右銓班秩華
貴尤匪魏王侍中晉夏侯常侍埒又重之以淵識峻望
尚宜積累生時列其德行而用以達善之實乎楊子雲
曰注諸旒旌曹子建曰表之素旗糴幽壙而覈之為誌
為銘闢神道而揭之為碣為碑其易名也為太常考功

之議其褒錫也為舍人制誥之辭誅曰

肇始露門聿衍承旨時維湯公任專學士肇始小宰聿
衍文昌時維湯公任貼侍郎公任東觀經華史雋公任
左掖律彙例辨洎任列卿省月象河洎任納言糾蠹振
瘡曩任提舉竇絕緡楮奚衿匪才奚餽匪諳比任審官
徑絕痕癰奚品匪單奚秩匪寒維茲吉士四

命教習鑑儼渭分資均泉挹蓋公經業系呂派朱蓋公
詩律翕白闡蘇萃是衆美宜躋三壽是抑奚否譽抑奚

咎始昕奚曠炎旭奚氛奚表宛若而音莫聞晉高汧督
慷慨猶視宋美徵士雅極思致維公奚憾維誅奚哀書
以志頌謚策嗣開

哀辭

哀惱來山辭

唐天祐二年春二月己酉葬聖穆景文孝皇帝於和陵
廟號昭宗和陵在河南緱氏縣惱來山是年更名天平
山後世儒者知哀崖山而不知哀惱來山爰著辭以哀

之曰

嗚呼自長水之謀不減平西之議虛發金鑾息對白馬
流災其御朝也匪含元殿而貞觀殿矣其入閣也匪紫
宸殿而崇勲殿矣其出令也匪宣政門而光啟門矣其
內宴也匪積翠亭延喜樓而積善宮矣擊毬供奉小兒
裁餘二百且並易置而宣徽九使復胥寢罷矣然則昭
儀內夫人之訖及難也又奚怪哉甚而褻宗之廟號恭
靈莊愍之諡起居郎至握郊壇枋而和陵抔土遂與曹

州之叢廟而胥傳也哀哉哀哉竊嘗謂古今人主無可
以失天下之譽而不幸而失之者有三主焉曰梁簡文
帝曰唐昭宗曰金哀宗其可哀涕也蓋猶在漢平明惠
上

陳生啟芸哀辭

華州陳生啟芸字芳潤分守蒼梧參議斌如之孫中書
舍人恪之子壯而嗜學年十有四試順天七藝完整監
試貝子奇之亟賜珍餌甲辰年十有八試中式榜揭二

十餘日而病病而蘄學不克學而病彌劇乙巳春正月
十有二日卒噫可哀也才穎者不必顯顯者不必才穎
醇慤者不必壽壽者不必醇慤而生且可以顯而卒卒
不疾顯可以無夭而訖夭也何邪蘭茝不泆旬芝秀不
崇朝而毒河源之樹高千餘尺垂陰數頃鸞鳳隕影孔
翠失彩而梟鳴帳中反謂六博得梟者勝又何邪故曰
理有所不可詰數有所不可窺崇道者專守焉以完其
性惇倫者旁參焉以紓其哀予爰草辭用遺洲若王子

而轉遺舍人君辭曰

辭以紓哀也而予行草辭既抑且不勝苦哀也噫予其如生何生其如命何

范生觀水哀辭

范生瀾字觀水荆溪雙橋人嗜讀書尤工制義能拔奇於西安西江嘉魚之外而氣特忼邁補郡博士弟子旋食餼望甲常郡九學業文者胥尊企之七試有司而訖落丁未閏三月病卒邑里胥掩涕曰亡一才士矣嗚呼

大鈞旋氣塊軋錯揉干隱奚以不第勃賀奚以天邪鷹
奚拙於賦揚觀奚艱於箋孟邪如明用制義衡士士率
頰首而焦神憔悴於此而天池徐氏瞻迴尤氏房仲王
氏席之管氏大復張氏太質繆氏思曠徐氏眉生沈氏
吉士錢氏子常楊氏奚以宜第而訖不第秋水莫氏即
山沈氏勒卣周氏又奚以不宜天而天邪夫君子亦擁
其可知者而已若不可知者雖聖人不能知也而予又
奚自知之姑辭以志哀而抑以少紓其父母之哀辭曰

行不謫闇兮于友載章文不汨緝兮于古載光今且奚
歸兮歸于無何有之鄉昌黎韓氏有言嗚呼哀哉兮是
亦難忘予知生之目且凝視曰父兮母兮尚其成忘兒
宜亡兮不亡

呂靜文哀辭

梁人擁明孝若山賓曰儒衍該通志用稽古溫厚淳和
倫雅洪篤又曰不謂長往眇成曩日追憶談緒皆為悲
端擁劉孝陵遵曰內含玉潤外表瀾清又曰惟與善人

此為虛說哀哉蓋靜文呂子之謂也哀哉予邑鳴周葉
子嘗遊旌川客歲舉博學宏辭名籍甚公卿間而仲秋
先歿於京邸爰聯舉梁書曰談對如昨音言在耳零落
相仍皆成異物每一念至何時可言天下之寶理當惻
愴

辭

新安溪辭頌吳貞女


并序

貞女歛溪南吳君霖蒼女也字章岐汪氏子晉紹晉

紹卒貞女年十五訃聞不食誓志貞守今十有九年
矣吳君世以學著女復克書古列女傳予謹賦新安
溪辭爰頌清芬式飲雅化

潭不掩鱗千丈見底新安之溪清載圖史猗與貞叔延
陵氏女幼而壯默罔讐於禮歲十有五夫亡死矢行二
十褌不少瑳齒載苴載素載杼載度舅姑虞筵嗣子烝
几何以况之清如溪水維貞女山黔鄣列施邱陵陸阿
學山不已爰頌以揭聯閭比里緹總以上處室之子當

學茲溪淵瑩瀨泚慎旃慎旃湜其汴濯纓濯足聖謨
自取抑鑒水者盍申厥指茹溪漏石荆駕雅旨冉溪鋤
鳴柳辭竊擬貢甘伊尤附要伊恥釣是清也苦節異軌
關以啟之尚克鑒止



存研樓文集卷十五